

近代中國史料叢刊第三十一輯  
沈雲龍主編

金粟齋遺集

蒯光典著

文海出版社印行

金粟齋遺集

1/21/10

金粟齋遺集

姪壽樞  
敬署

中華民國

十六年

于江甯

序

吾國政學新舊遞嬗之交以光緒間爲鈐轄蓋甲午之役庚子之役戊戌之變悉踴躍其世國事羹沸懲前毖後人才亦因是奮起當是時北則有翁常熟倡于京朝南則有張南皮倡于兩湖兩江莫不以學術氣節相號召海內瓌璋閎碩之士雲會焱赴爭相鏃礪而先師蒯禮卿先生遂以清流見稱于時先生幼能詩初不炫襮而于政學則所見異于人人常數數言爲學以六書九數爲涂轍實導源乾嘉諸老言西政則卽歐游所獲以上下互相監督爲憲法精義以普及教育公共衛生爲維新急務其時承學之士輒苦其艱奧不肯習政治家則視爲平易而末之省泊乎末流爲學者失在專鶩

鄙俚罕究根柢古經史子古文章幾瞠目不能解釋爲西政者失在假歐制以騁私欲剗削監督權其名教育衛生其實植朋營私坐令民主邦之暴戾顛制甚于君主邦相萬然後歎先生之言誠國粹之醞母救時之藥石焉論者又以先生治經久有不忍之心不敢之心坐是不鉅顯然國家命脉恆視此不忍不敢之心爲維繫聚羣無不忍無不敢之人而國以亡聚羣有不忍有不敢之人而國以興烏足以是爲詬病耶先甲始受知于先生以光緒丙申善先甲所爲選雅廣續方言暨其它述造于是授以音韻之學遂獲親炙先生沒先甲旣纂行狀上史館猶思紀錄學說卒以亂離擾攘草創未就今歲若木總裁迺舉先生生平論箸百方蒐采哀其所有

屬爲董理則先生之沒已二十年于茲矣嗟乎若木是役誠  
賢于輓近士大夫沈霾先人遺著于塵封蠹蝕者遠已迺悉  
心釐訂其叢藁之殺芴者則取菁舍蕪其傳寫之譌脫者則  
折衷蘄當編爲八卷先文次詩次詞而以傳狀之屬弁首若  
木鏤板先甲覆緝既竟迺揭藁學術升降之原國家興亡之  
本俾後之君子以觀覽焉

中華民國己巳歲受業江寧程先甲一夔謹序





金粟齋遺集目錄

卷首

傳神道碑墓志銘行狀公稟事實冊事略共八首

卷一至卷六

文二十三首

卷七至卷八

古近體詩九十三首

增錄

詞四闋



金粟齋遺集卷首

清史本傳

見清史稿列傳卷二百三十九

蒯光典字禮卿安徽合肥人父德模見循吏傳光典幼慧八歲能詩隨父官江南所師友多當代名儒聞見日擴名亦日起其論學務明羣經大義而以六書九數爲樞紐治六書則必求義類以旁通諸學識雙聲以明假借性强記有口辯尤熟於目錄掌故有所論難援據該洽莫能窮也光緒九年進士授檢討典貴州鄉試與其副不相下以狂倨見譏然榜發稱得士充會典館圖繪總纂精密勝於舊中東兵起發憤上書不報遂乞假歸總督劉坤一聘主尊經書院講席光典念國勢弱在列諸人惟鄂督張之洞有大略又嘗所從受業師

也因往說之洞慎選才俊習武備爲異日革新庶政之用之洞躉之卒不果而聘爲兩湖書院監督二十四年敘會典館勞以道員發江南創辦江南高等學堂大學士剛毅按事江南司道百餘人同詣謁獨延光典密室縱談國事語切直剛毅大憾卽議裁高等學堂光典力爭不能得拂衣去坤一兩解之檄赴鹽城丈樵地樵地者故鹽場葦蕩也年餘得可耕之地七萬五千畝收入荒價亦鉅萬領正陽關督銷局歲增銷官引百數十萬會之洞代坤一爲總督以江南財匱用不足議增貨釐光典謂增新釐則病商毋寧整齊鹽課之洞因奏陳兩淮鹽事袁旺謂北鹽視正陽銷數南鹽視儀棧出數光典爲江南治鹽第一督正陽旣有績請使主儀棧期三年

成效必可觀詔允之光典旣莅事以輪船駐大江三要區首  
金焦次三江口次沙漫州輔以兵艇私梟欵迹始儀棧出數  
不足四十萬引比三年增引十餘萬歲益課釐銀百五十餘  
萬乃益增募緝私兵隊日夕訓練成勁旅又於十二圩設學  
堂建工厰遂隱然爲江防重鎮三十二年授淮揚海道加按  
察使銜寶應饑民劫米令潛逃適光典舟至剴切諭解之而  
揚州亦以饑民劫米告訶知猾胥陰煽眾卽擒治胥大吏怒  
將窮其獄以光典言得免運河盛漲光典先分檄河員增修  
隄而自泊舟高郵守視壩險工迭出大吏以故事視節候測  
水檄啟壩不爲動歷月餘啟二壩七月杪乃啟三壩下河六  
縣獲有秋建言淮海災區廣宜寬籌賑金不宜設粥廠使災

民廩集費不貲且生事與布政使繼昌議不合會奉檄入都  
參議改定官制遂去任後江北賑事欸絀而費糜一如光典  
言三十四年命赴歐洲監督留學生諸生不樂受約束輒相  
訾警歲餘謝職歸詔以四品京堂候補充京師督學局長宣  
統二年提調南洋勸業會卒於江寧

蒯禮卿京卿傳

金壇馮煦蒿庵撰

君蒯氏諱光典字禮卿一字季述先世籍襄陽明中葉有曰  
應先者始遷合肥遂爲合肥人父德模仕終夔州知府所至  
有聲爲當時循吏冠予曾銘其幽世系皆載誌中君資稟絕  
人八歲能爲詩兼善擘窠書有神童之譽爲學務規其大恥  
爲無用旣承庭訓師友復爲當世耆傑合肥三名士君師朱  
默存而友徐南陽王謙齋夔州公知長洲君獲見馮林一俞  
曲園兩前輩又與管申季王芾卿葉鞠裳爲深友故所得異  
於恆人其侍夔署時張文襄方督蜀學君往謁之縱論學術  
流別遂爲文襄所知光緒丁丑宅夔州公憂奉喪歸僑建康



與賢豪聞者游益力於學壬午舉於鄉癸未連捷成進士選庶常丙戌散館授檢討供職西清廉潔自守一無所干暇輒究心文物制度鈎抉精意冀一盡其用商榷同列汲引後進皆以學問文章氣節三者爲先戊子充貴州正考官己丑復充順天鄉試同考官拔優選異後多顯名以去會典館開君爲圖上總纂官予副之端緒紛紜雖因實創其發凡起例多君所手訂同列咸遜謝不若也甲午中東釁起潰敗相尋君上本衙門代奏謂戰和皆失當後此何以令天下陳兵事機略所宜落落萬言悉持危定傾之論上聞不報君亦以久次送知府遂南歸張文襄署江督留君司章奏有大興革每就君諮決文襄反鄂任復黜君行使主武備學堂兼兩湖書院

未幾會典館書成過半君敘前勞以道員用君住居江寧久風土人清所夙諳故指分江蘇時劉忠誠督兩江易儲材館爲高等學堂而以君監之君博稽東西教育之原訂程則勤講肄數月而效大著會故相剛毅至寧剝剔餉糈將攬學堂經費濟近畿武備君獨往謁力陳摧殘學校非計剛毅爲動容然大府卒腴削與之學堂以廢乃檄君清丈鹽城樵地樵地民蠢蠢欲動君但繫其魁薄懲之不輕入人罪也歲餘得地七百餘頃入荒價數萬以是勞督銷正陽淮北鹽淮北鹽贖敗久君鈎稽利病盡得伏匿狀不一歲悉剷除之官引暢銷後來者永以爲法而君亦以諳習鹽務聞矣文襄復署江督奏以君督揚子淮鹽總棧期以三歲時私梟充塞勢張甚

緝私兵弁轉倚以爲利無撓之者君募淮勇成一軍以自助  
靡水與陸日偵緝之梟以懾伏歲增課百萬場運兩商咸獲  
利倍蓰羣謀君爲運使冀得長此蘇息君笑曰予其甘爲聚  
歛之臣者耶君任淮揚道僅五月而崇績不勝書丙午歲饑  
淮揚米值騰踊奸民藉以劫掠勢岌岌君往諭以義不終日  
而定大吏懼其乘隙爲變也欲以峻刑治已上聞矣君爲貧  
民迫饑寒官吏坐視其困是使其行險徼幸也又從而罪之  
乎力持不可卒治首者禁錮數年而已是夏淮海霖雨漚河  
暴漲故事本道當親往督守以應機勢漲不已啟歸江諸壩  
洩諸海甚則啟車邏昭關諸壩繼之然壩啟則以裏下河爲  
壑故民之保壩者如蜂屯蟻聚君駐工次五十餘日權利害

輕重而力守之逾往例月且半秋禾盡穫始次第啟之民得免蕩析之苦淮北之已成災者官吏匿不以聞君親撫問報大府上籌振八策並助萬金爲之倡方運河之漲也江北提督劉某飛檄君啟壩君以去就爭屹不動故民尤德君君旣去官爭爲祠祀之然以是積與劉某忤張文襄乃奏以君爲歐洲留學生監督挈家往英釋紛靖囂納之正軌閱歲餘鬚髮盡白歸以勞簡四品京堂君受文襄知最深且久君歸文襄旣前卒世變日亟君益無意於人事矣南歸杜門一提調勸業會非其志也逾年以疾卒於江寧寓中君於學無不窺精析訓故窮究義理其推勘多前人所未能尤究心江慎修戴東原金輔之程易疇四家之言謂其學足成用且可融洽

新舊也嘗纂釋三禮欲繼江戴之志以收輔世牖民之效稿垂成而燬於火幼喜咏詠西蜀山川之勝一寓於詩人謂其瓣香玉溪生次亦不弱明七子也尤長鑒別書籍金石所聚至夥並世能及者繆京卿藝風外殆無其匹又善弈入第三品然於君皆末藝也生成豐丁巳五月十五日卒宣統庚戌十二月九日年五十有四以某月某日葬某鄉之原初娶韓夫人繼娶李夫人側室王氏子四人孝先受先彥先秀先女一人孫三人孫女二人

馮煦曰予庚午始交君於江寧廨中君年十有四耳於學術正變政治利病已燭照而數計每與劉恭甫汪仲伊秦伯虞陳雨生諸君燕集秦淮君論議風發泉涌袞袞不自休有申

一難者君必往復論列屈其坐人而後已其出而應官京外也亦然卒以是叢眾忌目君爲狂故所至多陽禮而陰伎之不獲大行其志然巡淮揚不半歲而勤勤恤民執正不同非權勢所能奪正不負君之志與學矣彼目君爲狂者悠悠之口何足損君毫末哉



候補四品京堂蒯公神道碑

義寧陳三立敬原撰

國家自海通以來南北洋屹然爲國內重鎮南洋轄三巡撫  
四布政使地尤廣士大夫欲發名成業以才智自效於時者  
爭趨江寧江寧者南洋大臣兩江總督所駐地也光緒甲午  
南皮張文襄公自鄂督移權兩江於是合肥蒯公光典以翰  
林院檢討被辟爲幕府已而朝廷還劉忠誠公兩江文襄復  
督鄂兩公皆賢公先後聘主江寧兩湖書院講席公旣樂兩  
公相知又前官翰林時遼東兵事起上書言事不報發憤有  
乞外意公考四川夔州知府諱德模者從曾文正公官江南  
久公自少飭庭聞習知江南政俗利弊所與爲師友又多江



南菁儒宿學知名之士故公尤樂江南至是敘會典館勞改  
道員江蘇方議創江南高等學堂會大學士剛毅按事至江  
寧重公名延與語語切直忤大學士卽議罷學堂公怒拂衣  
去劉公兩解之檄丈鹽城樵地年餘得可耕地七萬五千畝  
荒價巨萬領正陽關督銷歲增銷官引百數十萬忠誠薨於  
位文襄復代爲總督議增貨釐用公言罷因奏言公江南治  
鹽第一請以公主十二圩鹽棧是時棧出鹽不足四十萬引  
公治之三年增十餘萬引歲益課釐銀百五十餘萬乃益募  
緝私營訓練成勁旅學堂工廠次第立隱然爲江防要區矣  
補淮揚道加按察使銜之官舟過寶應適饑民鬩洶洶令逃  
公維舟諭解之而揚州亦有饑民劫米事公詢其主謀者擒

治之事遂定淮揚道兼治河運河盛漲公先檄河員增修堤而自泊舟高郵壩大吏循故事檄啟壩公謂壩啟則下河六縣民田蒙其害堅不時啟河堤卒無恙而下河六縣民歲大熟民歌誦之以論振事與布政使不合會被檄入都參議官制因解任去不復還旋爲歐洲留學生監督頗與諸生爲約束諸生羣不便起作語言相訾訾鬱鬱居歲餘謝病歸詔以四品京堂候補充京師督學局長南洋創勸業會以公爲提調邁疾卒江寧年五十四公字禮卿幼絕慧八歲能詩舉光緒壬午鄉試明年成進士入翰林典貴州試與其副不相下時目爲狂然榜發稱得士蓋公於學無所不通尤有口辯論議援據該洽盡屈其座人亦用是多與時爲齟齬使公稍稍

推去牙角爲天子侍從之臣雍容迴翔卿貳可坐致卽不然  
藉劉張二公之知江南財賦之地以吏能自見亦可以躋通  
顯秉節鉞而公負其所學不肯自貶損降志以徇時終其身  
於遇不遇之間嗟乎發名成業以才智自效於時者其所遇  
或過公然而公遠矣家世婁妾子女葬所詳傳誌者不具書  
書公之所以遇不遇者以昭公之節概其亦公之志歟穹碑  
旣建綴以銘曰

淮淝勝區武節炳蔚比肩將相翊運扶世晚挺閎儒陰與韻  
頽綜攬流略道術爲昌萬怪蟠胸吐作霹靂辨口傾河廣坐  
辟易掖省迴翔規脫華選緒餘自試聲績照爛治劇張敞握  
籌劉晏駸麟忤俗進退何有瀛海使還願乖志苦搖精促齡

莫究其施寥寥狂狷揭勵來茲



候補四品京堂蒯君墓誌銘

桐城馬其昶通伯撰

君諱光典字禮卿合肥蒯氏當明中葉自襄陽來遷代有隱德祖諱廷理精醫術考諱德模終四川夔州知府曾文正公賞其廉能事在國史君生有奇慧八歲能詩夔州初官江南多接當代鉅人長德君濡染庭聞又益從馮林一劉融齋汪梅村諸先生問業於羣經大義及訓詁目錄算數掌故之學無不究覽天才英特高自標持每抵掌論事一坐盡屈以光緒九年進士授檢討典貴州鄉試負氣自喜與其副不相下致物論然榜發稱得主充會典館圖繪總纂精密勝於舊同館多知名士議論亦時相抵也遼東兵事起發憤上書不報

遂乞假歸張文襄公移督江南辟置幕府已而劉忠誠公還任文襄仍督湖廣二公皆夙知君先後聘君主講江寧及兩湖書院二十四年敘會典館勞以道員發江蘇建議創立江南高等學堂大學士剛毅按事江南司道百餘人同詣謁獨延君密室縱談國事語切直剛毅大憾卽議罷學堂君力爭之不得拂衣去于是劉公惜君才兩解之檄文鹽城樵地始君少時斐然有作述之志既入官猶思推儒術以致用當世再不得意而遂以吏能顯樵地者故鹽場葦蕩也君授任年餘得可耕之地七萬五千畝收入荒價亦巨萬復領正陽督銷局會張公再督兩江奏君江南治鹽第一謂兩淮鹽事衰旺北鹽視正陽銷數南鹽視儀棧出數蒯某督正陽既有績

請使主儀棧期三年成效必可觀詔允之君旣莅事以輪艘  
駐大江三要區首金焦次三江口次沙漫洲輔以兵艇私梟  
歛迹始儀棧出數引不足四十萬比三年增引十餘萬蓋張  
公初以江南財匱用不足議增貨釐君謂增新釐則病商毋  
甯整齊其舊貨釐之議由此止而鹽課歲益銀百五十餘萬  
公私頗饒給矣乃益募緝私兵隊日夕訓練成勁旅又于十  
二圩設學堂建工廠遂隱然爲江防重鎮三十二年授淮揚  
海道加按察使銜寶應饑民劫米令潛逃適君舟至剴切諭  
解之而揚州亦以饑民劫米告訶知猾胥陰煽眾卽禽治胥  
遂無事運河盛漲君先檄河員增修隄而自泊舟高郵守視  
壩大吏以故事憑節候測水檄啟壩不爲動歷月餘啟二壩



七月杪乃啟三壩下河六縣獲有秋民歌誦之以論賑事與布政使繼昌議不合會奉檄入都參議官制去任因不復還三十四年命赴歐洲監督留學生諸生不樂受約束輒相訾謗君爲人宏達不羈喜言興學爲國育才書史博辯在口至是舉無所用鬱鬱歲餘謝職歸詔以四品京堂候補充京師督學局長宣統二年提調南洋勸業會卒於江寧年五十四明年葬合肥北鄉朱小河之原配韓氏李氏側室鄭氏王氏子四人孝先受先彥先秀先皆肄西學女一人先是君被使命將行矣始與余見索贈言意懇懇也余諾之未及爲今承君從子壽樞之請次君行事納諸壙蓋以君之才遭逢斯世嘗通顯矣願亦未可謂遇古今來豪傑志士功名之所建樹